

Bia lavur da piunier e plirs obstachels

La classa da talents el secund onn da scola

DA GIUSEP VENZIN / ANR

■ 26 scolaras e scolaras visetan las Clases da talents Surselva. Da quels ein endisch giugadurs da ballapei, 13 sportists da neiv e dus musicists. La scola re-
tscheiva en cuort en cumbinaziun cul Surselva Skiteam (SST) il label da Swiss Ski sco center da prestaziun regional. Ils responsabels cun Gieri Tschuur alla testa han prestau dabia lavur da piunier. Ei resta denton aunc bia da far. Oravon-
tut ston ils responsabels sensibilisar differents vischnauncas ed uniuns da sport da separticipar al project che catta sur ils cun-
fins dalla Surselva dabia interess. Treis uniuns da sport en Surselva cun sportists da muntada naziunala ed internaziunala ein aunc buc integradas el project Classa da talents Surselva – ils clubs da skis Sursaissa e Trun ed il Club da velo Surselva. Gieri Tschuur, il menader dalla scola dil Consorzi da scola Glion e contuorn, conceda: «Per haver success duvrein nus sper la scola era ina megliera infrastruttura da sport.» Il scolast muossa capientscha per las resalvas, fa denton valer che l'entira regiun profiteschi alla fin d'ina buna purschida. «Era Cuera ei vidlunder da realisar ina classa da talents. Sche nus setenin ensemen ei la Surselva en ina megliera situaziun.» Il menader da scola menziuna la halla da freestyle a Laax: «Quei füss ina schanza extraordinaria.»

Resalvas dils clubs

Il Club da velo Surselva ed il Club da skis Trun ein da muntada naziunala el sport da mountainbike e da cuorsa liunga ed en lur retschas treneschan bunamein tschien giuvenils. Tutina visetan negins da lur commembers la classa da talents a Glion. Sco Gieri Tschuur di fussen omis dus clubs dalla grondezia ennu habels d'acquistar il label da qualitat da Swiss Olympic. Il Club da velo Surselva ei gia sefatschentaus avon entgens onns cull'idea da daventar in center da competenz da Swiss Olympic. Muort munconza da trenaders qualifica



Ils talents da ballapei treneschan a Glion polisportiv ed a Bogn Ragaz specific il sport da ballapei.

FOTO G. VENZIN

ha il club mess l'idea en truchet. Era senza il label da Swiss Olympic numna il club il campion mundial da mountainbike in dils ses. La classa da talents fa reclama cun Nino Schurter, mo Guido Schweizer, il president dil Club da velo Surselva, di: «Nus havein contonschiu grondius success senza la professionalitad giavischada da Swiss Olympic. Perquei sefidein nus vinavon dalle structures francadas ils davos onns.» Ella medema crena dat era il president dil Club da skis Trun. Alois Tambornino, sez scolast e bab dil currier dalla squadra naziunals da sprint da cuorsa liunga Eligius Tambornino, ha menau dacuort ina discussiun cun Martin Gabriel, cul president dil Consorzi da scola Glion e contuorn e cun Alexi Pfister dall'uniun dils promoturs, mo el ei aunc buc fetg scaldaus da realisar in center da competenz da cuorsa liunga a

Trun. Il bab da quater affons menziuna in ulteriur aspect: «El sport da cuoz drovi tochen 16 onns neginas structures professiunales, il plascher dil sport ei pli impurtant.» Alois Tambornino conceda che la Scola da talents seigi en scadin cass d'avantatg per differents sports.

Negins skiuons da Sursaissa

Cun Carlo Janka e Christian Spescha poseda il Club da skis Sursaissa dus dils megliers skiuons dil mund. Ils Wisalis – ils commembers dalla OG Sursaissa – ein enconuschents ell'entira Svizra e cun Pius Berni poseda il club in trenader professiunal. Quei luxus sa strusch in auter club prestar ed il Club da skis Sursaissa ei gia dading in center da competenz senza etichetta officiala. Quella etichetta retscheiva la Surselva en cumbinaziun culla classa da ta-

lents e Sursaissa ei ina part dil center. Mo ils talents da Sursaissa frequentan buca la classa da talents a Glion. Pius Berni: «Quei fagess ella situaziun actuala negin senn. Ils affons van a scola e treneschan a Sursaissa. La viseta dalla classa da talents a Glion caschunass mo dapli viadis.» Il mistral dil cumin da Rueun e scolast primar conceda denton: «La classa da talents ei ina buna causa.»

Ballapei a Bogn Ragaz

Bunamein la mesadad dils scolaras dalle classes da talent ein giugadurs da ballapei. La realisaziun d'in center da competenzas da ballapei en Surselva ei tenor Gieri Tschuur strusch pusseivel. Ils talents da ballapei treneschan a Bogn Ragaz. «Pils juniors U14 ei quei la megliera soluziun.» Cundiziun, coordinaziun, forza ed

equiliber treneschan las scolaras ed ils scolaras era a Glion sut la direziun da scolasts da sport e trenaders professiunals. Il venderdis han ils giugadurs da ballapei trenau polisportiv cul scolast da sport Werner Walder ed il trenader Florian Capaul digl SST ha survigliu il trenament dils skiuons e curriers da cuorsa liunga.

Resalvas dalle vischnauncas

Las vischnauncas sursilvanas ein aunc buc unitas el sustegn dils talents da sport. Gnanc las vischnauncas dalla Cadi ein unitas. Fertion che Tujetsch e Mustér surprendan ina part dils cuosts pils scolaras da lur vischnaunca che visetan la scola a Glion, vulan las vischnauncas da Breil, Sumvitg e Trun buca far quei per tema da piarder scolaras ch'els drovan urgentamein. Richard Caduff, il president dalla vischnaunca da Breil, conferma quella tenuta: «Nus stuein sbatter per tener la scola secundara e duvrein mintga scolast. Pil mument savein nus pilver buca pagar quella summa alla scola a Glion.» Ei setracta da 12 000 francs.

Gieri Tschuur capescha las resalvas dalle vischnauncas, di denton: «La sminuaziun dil diember da scolaras sforza las scolaras en cuort tier novas cooperaziuns. La classa da talents ei ina schanza da mantener ils scolaras ella regiun.»

1. classa
Matias Alig, ballapei; Rafael Berther, ski alpin; Tamara Beutler, snowboard; Samuel Caderas, ski alpin; Orlando-Dea Cadonau, ballapei; Janine Caduff, ski alpin; Dario Cavetti, cuorsa liunga; Fabian Coray, ballapei; Rafael Deplazes, ballapei; Dario Pfister, ballapei

2. classa
Linda Arpagaus, ski alpin; Nando Cabalzar, ballapei; Janic Caduff, ski alpin; Clau Anton Camathias, ballapei; Ivan Derungs, ballapei; Sina Halter, musica; Sandro Orlik, ballapei; Sven Spescha, musica; Robin Studer, ski alpin; Tobias Walter, ballapei

3. classa
Serafin Bundi, ballapei; Kevin Caduff, ski alpin; Marco Gämperle, ski alpin; Manuel Isenmann, cuorsa liunga; Gian Ragetti, freeskii; Cedric Spescha, ski alpin

Dil Sternen ella Steila

Fiasta da ventschidas dalla Ustria Steila a Siat

■ (anr/gv) Marco Bernasconi e Marita von Vigier midan dil Hotel Sternen a Soloturn ella Ustria Steila a Siat. Il venderdis sera han Gabi e Theo Schaub – ils possessurs dalla ustria enamiez il vitg – envidau alla fiasta da ventschidas. Cun quella caschun han ils hospes da vacanzas da Siat presentau ils migiurs dall'ustria baghegiada tenor ils plans digl architect Gion A. Caminada da Vrin. «Igl ei buca sulet ina midada da piazza, ei setracta d'ina midada dalla veta», ha igl ustier da 55 onns detg e fatg attent che sia purschida seigi buc alternativa, denton outra. Theo Schaub, igl impressari da Turitg, ha communicau il termin d'avertura. Quei ei ils 4 da december. Igl architect ha alzu il tguu: «Lu sto enzatgi seduvrar.» Ed il possessur ha menziunau che las fatschentas indigenas hagian tarmess lur megliers luvrers per construir l'Ustria Steila en betun ed en lenn. El ha era puntuau da haver risguardau las interpresas indigenas. «Ei ha dau sulet ina excepziun. Las lavurs da pictur fa ina interpresa da Turitg.» Ei setracta da sia atgna. Theo Schaub poseda ina interpresa cun 100 collaboratur, denter quels era Sursilvans.

Ustria ei program

Avon treis onns ha l'Ustria Surselva che sesanfla ella vischinonza dall'ustria nova serrau las portas. Cuort suenter han ils hospes da Turitg mussau interess da realisar ina casa d'albiert ed ils vischins han



vendiu allas Immobiliarias Schaub in toc terren sut la stizun dil vitg. Gabi – ella ha empriu romontsch – e Theo Schaub han adina puntuau che Siat seigi per els dapli ch'in liug da vacanzas. Quei demuossa era il sustegn en favur dalla Pro Siat ch'ei vidlunder da realisar entgens projects en favur dil vitg sin 1300 meters sur mar. Igl impressari ha giavischau da Gion A. Caminada in baghetg da valeta cuzzonta. El Plaun dalla Greina ein ils dus umens secunvegni avon dus onns da collaborar. L'ustria a Siat ei concepida sco ustria dil vitg che duei denton era carmalar ils hospes d'ordeifer – quei cul baghetg sco era culla purschida. Marco Bernasconi vul realisar las ideas digl impressari da Turitg, conceda denton che quellas ideas secumportien cun sia filosofia. «L'ustria ei era program», ha el detg. La purschida culturala duei cumpletar la purschida culinaria. Igl ustier ha era puntuau ch'el vegli far tut per porcher in liug da scuntrada adattau per las uniuns dil vitg.

Festivau ventschidas e presentau igl ustier. Gabi e Theo Schaub (dretg) ein ils possessurs dalla Ustria Steila a Siat. Marita von Vigier e Marco Bernasconi ein ils migiurs. L'avertura ei prevedida pils 4 da december proxim.

FOTO G. VENZIN

ARTG PERSONAL

Gratulaziun a Glion: Igl emprem da settember 2010 sa Gerda Venzin-Andriuret festivar il giubileum da 20 onns en survetsch dil Spital regional Surselva a Glion. Ils medems giubileums san Maria Mader-Hunziker e Regina Maisen-Arnold festivar miez settember. La direziun dil spital gratulescha ed engrazia allas treis giubilaras per il grond engaschi e giavischas ad ellas vinavon grond success e bia satisfacziun en lur clamada.

reclama



Markus Möhl Ernst Möhl

Qualität aus Familienhand

Unsere natürlichen Apfelsäfte kelteren wir ausschließlich aus Äpfeln der Ostschweiz. Wir kennen die Lieferanten persönlich. 60 Mitarbeitende geben ihr Bestes für eine hochstehende Saffherstellung. Wir stehen ein für Qualität, Tradition und langfristige Arbeitsplätze.



MÖHL Mosterei Möhl AG
9320 Arbon | Tel. 071 447 40 74 | www.moehl.ch